

四庫全書

經部

欽定四庫全書

經部

重訂詩經疑問卷三

詳校官監察御史臣曹錫寶

通政使司副使臣莫瞻某覆勘

總校官檢討臣何思鈞

校對官中書臣嵇承志

謄錄監生臣秦聯登

欽定四庫全書

重訂詩經疑問卷三

魏

明

姚舜牧撰

糾糾葛屨可以履霜
慘慘女手可以縫裳
要之襍之好人服之

好人提提宛然左辟
佩其象揄維是褊心
是以爲刺

詩序刺褊也其民機巧趨利由其君儉嗇褊急而無

德以將之也故詩泛言尊貴而不斥其君

魏地陝隘其民窘於衣食故生機巧之心而急於趨利男子葛屨既敝以繩糾纏之而用以履霜奔走而不休未嫁之女纖纖其手謂可出以縫裳而利其傭資為好人之服也斯非好人之褊急而曷以至此哉故稱其服飾威儀之美而直刺其褊

提提左辟云云是其外狀之舒徐也而中心則褊急矣故承說維是褊心維是二字有細味

勤儉是美俗而或失之過則褊矣褊正與寬對不寬
不褊君子居身之所珍也

彼汾沮洳言采其莫彼其之子美無度美無度殊異乎
公路

彼汾一方言采其桑彼其之子美如英美如英殊異乎
公行

彼汾一曲言采其蕢彼其之子美如玉美如玉殊異乎
公族

詩序刺儉也其君儉而能勤刺不中禮也

此非興也魏俗嗇陋即卿大夫之家或亦下侵民利故以采莫采桑采賈刺之言其人雖美殊異乎大家之體段也後世有拔園葵去織婦者達此詩之旨矣註刺儉不中禮殊未盡

園有桃其實之穀心之憂矣我歌且謠不知我者謂我士也驕彼人是哉子曰何其心之憂矣其誰知之其誰知之蓋亦勿思

園有棘其實之食心之憂矣聊以行國不知我者謂我士也罔極彼人是哉子曰何其心之憂矣其誰知之其誰知之蓋亦勿思

詩序刺時也大夫憂其君國小而迫而儉以嗇不能用其民而無德教日以侵削故作是詩也

此必國家用匪人以亂國是其為士者有深憂焉故曰不知我者謂我士也驕彼人是哉子曰何其云爾註恐未得其肯綮敢問高明

園有桃其實之殺園有棘其實之食皆有取意國家
必用楨幹之臣園林必植梧櫟之木舍喬木而唯桃
之殺棘之食國是已非矣而彼不知者猶曰彼人是
哉子曰何其真不思之甚者也詩人重懷隱憂故為
此言

心憂而歌且謠聊以行國如楚屈原行吟澤畔之謂
歌謠是不平之鳴而顧謂其驕行國懷無窮之思而
顧謂其固極士君子憂時憤俗之心不諒於世每如

此

陟彼岵兮瞻望父兮父曰嗟予子行役夙夜無已上慎
旃哉猶來無止

陟彼屺兮瞻望母兮母曰嗟予季行役夙夜無寐上慎
旃哉猶來無棄

陟彼岡兮瞻望兄兮兄曰嗟予弟行役夙夜必偕上慎
旃哉猶來無死

詩序孝子行役思念父母也國迫而數侵削役乎大

國父母兄弟離散而作是詩

止謂止彼而不思歸也棄謂棄此而不復返也死則
恐其止終無相見之期也前二章不必說到死三章
通說上慎旃哉見父兄之所以念其子弟與子弟之
所以慰其父兄者只在一個敬謹

知父母之心可以為孝子知兄之心可以為悌弟讀
陟岵之詩而不興孝弟之心非夫也

十畝之間兮桑者閑閑兮行與子還兮

十畝之外兮桑者泄泄兮行與子逝兮

詩序刺時也言其國削小民無所居焉

人各受五畝之宅行與子還是二人也故稱十畝之間

閑閑從容自適之意泄泄放蕩不拘之意

曰十畝之間又曰十畝之外曰桑者閑閑又曰桑者泄泄蓋深嫉朝市之莫可居而欲飄然於風塵之外也仕者之心如是豈世道之福哉

細玩魏之詩見魏之俗尚大抵以褊急勝君子不欲仕而樂就桑者之閑閑小人不欲居而甘就樂土之得所則其時其政蓋可知已

坎坎伐檀兮寘之河之干兮河水清且漣漪不稼不穡胡取禾三百廛兮不狩不獵胡瞻爾庭有縣貆兮彼君子兮不素餐兮

坎坎伐輻兮寘之河之側兮河水清且直猗不稼不穡胡取禾三百億兮不狩不獵胡瞻爾庭有縣特兮彼君子

子兮不素食兮

坎坎伐輪兮寘之河之湄兮河水清且淪漪不稼不穡
胡取禾三百困兮不狩不獵胡瞻爾庭有縣鵲兮彼君
子兮不素飭兮

詩序刺貪也在位貪鄙無功而受祿君子不得仕進
爾

此疑是國家用違其才而士不苟祿故作此詩以致
美

伐檀本可為車寘之河干非其地矣若是即河水之
清漣何取哉抱學本以大受寘之閑散非其任矣即
優游以窮祿何為哉故就君子之意推之車用以田
則可以載禾不稼不穡胡取禾三百廛車用以獵則
可以載獸不狩不獵胡瞻爾庭有懸貆蓋謂受匪其
祿弗取而弗視之也彼君子兮不素餐兮即照上二
句說

易曰大車以載君子抱此大具而寘之無用之地何

為哉

胡取禾三百廛胡瞻爾庭有懸貆即祿之以萬鍾弗顧也繫馬千駟弗視也之意

三百廛便見是禾藏於室者庭有懸貆便見是非今所獵得者下倣此

伐輻伐輪伐檀以作輻作輪也車非輻不具非輪不行

碩鼠碩鼠無食我黍三歲貫女莫我肯顧逝將去女適

彼樂土樂土樂土爰得我所

碩鼠碩鼠無食我麥三歲貫女莫我肯德逝將去女適彼樂國樂國樂國爰得我直

碩鼠碩鼠無食我苗三歲貫女莫我肯勞逝將去女適彼樂郊樂郊樂郊誰之永號

詩序刺重斂也

元元赤子全賴長我者之顧復取之盡錙銖而略不一軫顧焉秦越人之視也民寧不轉而之他哉居上

者導利惠民上之直也居下者安生樂業下之直也
爰得我直蓋謂此可以安生樂業云爾

上貪殘而不恤其下民莫不永號矣杜詩云哀哀寡
婦誅求盡痛哭郊原何處村此永號之謂也

貪殘者之取諸民何所不至哉故曰碩鼠碩鼠無食
我黍云云貫即惡貫滿盈之貫三歲言其久貫已三
歲而莫我顧莫我德莫我勞其將何所窮極哉此決
于去一往而不返也

統魏詩觀之於葛屨見居室者之不體下情於汾沮
洳見居官者之不遺民利於園有桃見國是之日非
於十畝之間見仕者之不樂於朝於伐檀見賢者之
不苟於祿於陟岵見其所以役民者於碩鼠見其所
以賦民者總之則儉嗇之過至於褊急而上下皆不
勝其求也記曰國奢則示之以儉國儉則示之以禮
若魏風者示之以禮其可復先王之舊哉

唐

蟋蟀在堂歲聿其莫今我不樂日月其除無已大康職
思其居好樂無荒良士瞿瞿

蟋蟀在堂歲聿其逝今我不樂日月其邁無已大康職
思其外好樂無荒良士蹶蹶

蟋蟀在堂役車其休今我不樂日月其愒無已大康職
思其憂好樂無荒良士休休

纔說今我不樂日月其除即云無已大康職思其居
好樂無荒良士瞿瞿其憂深其思遠其相戒也與良

士而同歸真先王之遺風大勝於他國者

職思其居句極妙職職分也職業也士農工商各有其職各有其居就其職而思其居則必各止其所無然將縱以荒其職矣故下即承之曰好樂無荒良士瞿瞿意深哉職字不應作主字解

役車其休正歲莫之景可以務閑之時也

瞿瞿有却顧意蹶蹶有奮勉意休休有安閒意而本瞿瞿蹶蹶來註所謂樂而有節不至於淫所以安也

說職思其居又說職思其外見其所思者不獨在居而又當思及於居之外也說職思其外又說職思其憂見其所思者不獨在於職之外而又當及於終身之憂也憂字必如此解方透徹

山有樞隰有榆子有衣裳弗曳弗婁子有車馬弗馳弗驅宛其死矣他人是愉

山有栲隰有杻子有廷內弗洒弗埽子有鐘鼓弗鼓弗考宛其死矣他人是保

山有漆隰有栗子有酒食何不日鼓瑟且以喜樂且以永日寃其死矣他人入室

山有樞隰有榆正興子有衣裳子有車馬

說到寃其死矣他人是愉見及時為樂自有不容已者

說有衣裳有車馬有廷內有鐘鼓有酒食曲盡人間之所享

且以喜樂二句相承永日者盤桓以永此日也苟俗

尚懈荒即有規其節儉者弗能也乃唐之人不服不
乘至有勸其愉樂云者真聖帝遺風之厚哉

詩序刺晉昭公也初晉穆公生仇及成師仇立為文
公成師封于曲沃大都耦國稱桓叔文公卒昭公立
桓叔有伐晉之謀昭公禍在旦夕而不悟國人難察
察言之故作此詩非勸昭公為樂也謂可惜此衣裳
車馬之物將為他人所有故託言喚醒昭公使之覺
悟耳如以其辭謂不可不及時為樂聖人豈取以垂

訓乎此詩緝具見而詳載勝於朱註萬萬者宜改而從之

揚之水白石鑿鑿素衣朱襮從子于沃既見君子云何不樂

揚之水白石皓皓素衣朱繡從子于鵠既見君子云何其憂

揚之水白石粼粼我聞有命不敢以告人
弱晉而雄沃意全在揚之水二句上見

晉昭公非有大無道之事以自絕於民特其委靡不振養成曲沃之強而桓叔又有所以善取其民者故其民傾心而樂從耳

桓叔將叛而傾晉必有所以命國人者故素衣朱襮以從之而又心為之隱若無所事事者然上賊下之情譎矣下從叛之意堅矣吁此不軌之臣所以得行其志也

詩序刺晉昭公也昭公分國以封沃沃盛強有篡宗

國之謀而潘父陰立之將為內應而昭公不知故此
詩深警之謂昭公勿以沃為患之在外而猶緩也今
國內有謀應之者欲奉沃以為君而篡汝之位腹心
作難而外患乘之禍已迫矣我聞其事而不敢以告
人也言有命者迫切之辭言不敢告人乃所以深告
昭公也

椒聊之實蕃衍盈升彼其之子碩大無朋椒聊且遠條
且

椒聊之實蕃衍盈匊彼其之子實大且篤椒聊且遠條
且

詩序刺晉昭公也其辭稱桓叔之強其後必盛而其
意則憂昭之弱不可為支也

碩大無朋者碩大而無與為比也照下碩大且篤句
可見

椒聊且遠條且二語極可咀嚼曲沃晉之遠條也桓
叔謫計以得民而碩大莫與為比焉晉其能國乎詩

為此詞見晉之強實在遠條而不在本幹也范曄云
本實繁者披其枝披其枝者傷其心大其都者危其
國尊其臣者卑其主正如此章之旨

篤厚實也史記云自此秦益富厚輕諸侯此篤厚之
意

綢繆束薪三星在天今夕何夕見此良人子兮子兮如
此良人何

綢繆束芻三星在隅今夕何夕見此邂逅子兮子兮如

此邂逅何

綢繆束楚三星在戶今夕何夕見此桀者子兮子兮如
此桀者何

詩序刺晉亂也國亂則婚姻不得其時焉

夫婦好合有綢繆之情故以綢繆束薪興

束薪而至于三星在天可不謂儉且勤乎凡淫生於
奢佚如此詩所云是俗之極美者

通篇是喜不自勝之辭與淫佚不勝之辭自別

有杖之杜其葉滑滑獨行踽踽豈無他人不如我同父
嗟行之人胡不比焉人無兄弟胡不攸焉

有杖之杜其葉菁菁獨行叢叢豈無他人不如我同姓
嗟行之人胡不比焉人無兄弟胡不攸焉

詩序刺時也刺時政之亂而苦無兄弟之可托也人
無兄弟胡不攸焉不是憐我無兄弟而見助詩意若
曰嗟行之人胡不憫我之獨行而見親耶人亦有無
兄弟者胡不相憐恤而見助乎蓋致望於行之人而

又深致望於人之無兄弟者

讀杖杜之詩彼無兄弟者其情蓋亦悲矣乃今親兄弟同父母者或因財帛以啓爭甚且結異姓為腹心更假手為殘賊之計者吾不知其心何如也視此可自愧死矣

杖杜凡三見一見於此傷已之無兄弟也再見於後傷已之寡弱不足恃也三見於小雅傷征夫在外而未歸也總是孤特無倚之意

羔裘豹祛自我人居居豈無他人維予之故
羔裘豹褻自我人究究豈無他人維予之好

居居若與為藏笥以待服之意究究若與為檢視以
待服之意

故好即鄭風遵大路篇不寔故不寔好故好二字據
其辭似心喜大夫而就服以致其意者乃詩序刺時
也刺其在位不恤其民也豈以羔裘豹祛自我人居
居羔裘豹褻自我人究究我等之用情若此者豈無

他人之可委哉亦維子之故且好也故自我人而不付之
他人耳子何獨不加憐恤於我輩哉是或詩人之意也
袞是古袖字與袪不同

肅肅鵠羽集于苞栩王事靡盬不能執耒黍稷父母何怙
悠悠蒼天曷其有所

肅肅鵠翼集于苞棘王事靡盬不能執耒黍稷父母何食
悠悠蒼天曷其有極

肅肅鵠行集于苞桑王事靡盬不能執耒黍稷父母何嘗

悠悠蒼天曷其有常

詩序刺時也晉昭之後大亂五世君子下從征役不得侍養父母故作是詩

監亦監也池自結成不經久而易壞故註作不攻緻君子以王事不可不堅固故力役于外而無暇樹藝之謀

子所怙恃者父母也父母所依倚者子也相倚為命而困於王事無如之何故云云

豈曰無衣七兮不如子之衣安且吉兮
豈曰無衣六兮不如子之衣安且燠兮

詩序美晉武公也武公踵祖父之惡滅宗國而自立
曷美哉特其大夫之意耳

凡為人臣者與馬服飾惟君所予而不敢請請非禮
也得請而不拜命至云豈曰無衣不如子之衣若是
其較量焉可謂臣乎哉武公之上凌釐王之下替於
此詩可深慨矣

此與晚唐藩鎮坐邀天子之寵命者無異劉仁恭謂使者曰旌節吾自有之但要長安名色耳

一言不如子之安且吉再言不如子之安且燠則知苟無王命必不能安享侯爵矣王命可輕授篡弒之賊哉

有杖之杜生于道左彼君子兮噬肯適我中心好之曷飲食之

有杖之杜生于道周彼君子兮噬肯來遊中心好之曷

飲食之

詩序刺晉武公也武公滅宗國以自立而不求賢以
為輔於是賢者隱于山林國人私致其愛慕之意若
曰彼賢者其肯暫過我乎若肯過我我中心愛之將
何以飲食之乎此與丘中有麻曰將其來食與白駒
繫之維之于焉逍遙之意同觀國人欲自為飲食則
可徵君之不能養賢矣

此噬字即易噬嗑噬字啗也噬肯適我者猶今人云

咬定欲跟我隨我也若是則我中心好之矣曷其能
飲食之乎蓋深致望於賢者之來助而歎焉不能為
之禮也

葛生蒙楚藪蔓于野予美亡此誰與獨處

葛生蒙棘藪蔓于域予美亡此誰與獨息

角枕粲兮錦衾爛兮予美亡此誰與獨旦

夏之日冬之夜百歲之後歸于其居

冬之夜夏之日百歲之後歸于其室

詩序刺晉獻公也公好攻戰故婦人念其夫久役于外賦之曰誰與獨處獨息獨旦云者若曰我將誰與乎而獨處獨息之可憫也再曰百歲之後云者若曰生不得同其生聚維死庶或可以同穴云爾其詞慘且悲矣

處居處也此字義寬息則夜之息也旦則朝之旦也采苓采苓首陽之巔人之為言苟亦無信舍旃舍旃苟亦無然人之為言胡得焉

采苦采苦首陽之下人之為言苟亦無與舍旃舍旃苟亦無然人之為言胡得焉

采葑采葑首陽之東人之為言苟亦無從舍旃舍旃苟亦無然人之為言胡得焉

詩序刺晉獻公也獻公好聽讒言故詩以采苓起興言采苓采苓首陽之巔有是理乎凡人之言語且未可信將舍之而不聽乎亦且不可如此但當考其言何從而得之推其所自來則虛實盡見矣讒言之得

行由不問所來而遽信之耳漢昭帝悟燕王上書之詐益察其書所由來也

秦

有車鄰鄰有馬白顛未見君子寺人之令

阪有漆隰有栗既見君子並坐鼓瑟今者不樂逝者其
耄

阪有桑隰有楊既見君子並坐鼓簧今者不樂逝者其
亡

詩序美秦仲也秦仲始大有車馬禮樂侍御之好焉
是矣然秦仲修德為宣王大夫安得有寺人之令詩
傳襄公伐戎初命為秦伯國人榮之是為得之

秦之樂彈箏拊髀之樂也秦之聲擊甕扣缶之聲也
茲鼓瑟鼓簧而且與其民共樂焉民心寧無傾注乎
秦何以得民之深也意者犬戎搆難民受凌夷茲幸
得脫於鋒刃故叙國有車馬之盛欲相與為樂以終
身耶

阪有漆隰有栗見上下各有生植也正興下並坐鼓瑟意

未見君子而寺人可通既見君子而並坐為樂意當時秦君必通上下之情而深有以結其心者此駟鐵小戎胥樂於從武而益強富厚輕諸侯自此始歟大抵風俗以時變而不善變者未嘗不至於大敗秦初與民並坐鼓瑟悠何等簡易可親然其趨也必至於尊其臣卑其主而上之人不勝其憤則一變而森

嚴其堂陞使侍者曾不得持尺寸以上殿焉是始之簡易可親者其極敝必至於禁嚴而難近也先王制禮嚴尊卑之分而未嘗不通上下之情正不如此

駟馭孔阜六轡在手公之媚子從公于狩

奉時辰牡辰牡孔碩公曰左之舍拔則獲遊于北園四馬既閑輶車鸞鑣載獫狁驕

詩序美襄公也始命有田狩之事園囿之樂故詩亦喜創見而美之

通章是車馬射獵始終之事註極明

先王嘗從事于狩矣而未有以媚子從者此薄俗之風也

古者田獵匪直取以供三品蓋亦寓習武之意若此之田狩則專逞勇武以示其下耳此民俗競趨於強勇也

詩緝謂田犬皆長喙非田犬也犬若短喙性驕逸載獫狁驕謂以車載獫而歇其驕逸所謂休其足力也

是

詩緝云平王以秦之救周而命之異時諸夏之憂反
生於所救事之倚伏可豫料耶是故禦戎以自治為
上策

秦自非子養馬於汧渭之間周孝王賜之邑而開國
故其習俗惟盛車馬之飾而競為射獵戰鬪之事讀
車鄰駟鐵小戎之詩便見秦之所以兼山東而威強
者在於此其所以殃殲下民不保其子孫而受禍之

獨烈者亦在於此

小戎倭收五檠梁軒游環脅驅陰剗蓋續文茵暢較駕
我騏鼻言念君子溫其如玉在其板屋亂我心曲

四牡孔阜六轡在手騏驎是中駟驪是駟龍盾之合鍤
以釐輶言念君子溫其在邑方何為期胡然我念之

倭駟孔羣允矛鍤蒙伐有苑虎韞鏤膺交韞二弓竹
閉緄滕言念君子載寢載興厭厭良人秩秩德音

詩序美襄公也西戎暴我宗周而襄公備兵甲以為

討津津焉夸說之不已即婦人閔君子而猶有鼓勇之意是為秦風蓋風者從上以風下而下胥化之之謂也豈獨秦風哉諸國之詩皆有風意故並稱國風云

章首六句叙駕馭車馬之善下二章首六句又併其武備言之統見軍容之盛真足以赴敵而秦之所為強也

通章車馬武備之註極明

孔羣者大羣也下正言車馬之大羣皆有矛戈弓矢之備以見其從征者之不能脫離耳

此德音二字即德音莫違及爾同死之德音婦人若曰言念君子起居不寧甚矣何時得厭厭與良人好樂而秩秩再叙其德音乎則我之心願遂矣云爾三稱言念君子以致其私情而必先叙其軍容之盛是婦人亦知公義之為重也

此征西戎詩也初秦成為犬戎所滅周宣王命非子

曾孫秦仲為大夫誅西戎不克及幽王為西戎犬戎
所殺平王東遷謂秦襄公曰能逐西戎即有岐豐之
地襄公內激於前世之讐而外銜天子之命故其軍
容極盛即婦人女子亦知勇於赴敵而無所怨也嗟
乎在秦復讐之師尚如此况天子明正其罪復不共
戴天之讐乎平王不知為秦襄而俾小戎之詩乃出
於秦婦人之口吁可恨哉

蒹葭蒼蒼白露為霜所謂伊人在水一方遡洄從之道

阻且長遡游從之宛在水中央

蒹葭淒淒白露未晞所謂伊人在水之湄遡洄從之道
阻且躋遡游從之宛在水中坻

蒹葭采采白露未已所謂伊人在水之涘遡洄從之道
阻且右遡游從之宛在水中沚

詩傳君子隱於川上

闕

慕之賦蒹葭

所指不知何許人然觀其所叙景物皆瀟灑脫塵則
其人必高出於塵囂而非流俗之人所同矣秦無好

賢禮士之風安得有此意西周禮義之遺尚在伊洛之間或有異人者出而舉世仰之以為不可及者乎曰阻且長曰阻且躋曰阻且右言其遠而不可幾也曰水中央曰水中坻曰水中沚言其近而不可親也古人以右為上故曰右非不相值而出其右也觀上章自見

終南何有有條有梅君子至止錦衣狐裘顏如渥丹其君也哉

終南何有有紀有堂君子至止黻衣繡裳佩玉將將壽考不忘

詩傳襄公克戎始取周地秦人矜之

此必秦君巡遊於終南故為此詩

終南於秦為望山然非人君之所宜至也秦君之至止或亦假巡狩之名以愚民民故相稱頌以登歌耳自此濫觴後世遂有登封泰山稱遇有老父連呼萬歲者三或亦壽考不忘之遺事歟

交交黃鳥止于棘誰從穆公子車奄息維此奄息百夫
之特臨其穴惴惴其慄彼蒼者天殲我良人如可贖兮
人百其身

交交黃鳥止于桑誰從穆公子車仲行維此仲行百夫
之防臨其穴惴惴其慄彼蒼者天殲我良人如可贖兮
人百其身

交交黃鳥止于楚誰從穆公子車鍼虎維此鍼虎百夫
之禦臨其穴惴惴其慄彼蒼者天殲我良人如可贖兮

人百其身

黃鳥猶得止於棘止於桑止於楚此三良者乃用之以殉葬曾黃鳥之不若乎此詩人之所為深悼也
上言百夫之特下言人百其身蓋推國人之心寧以百人之身代其死非謂一人而百其身也

君子從治命不從亂命穆公悔過遷善有聲於秦乃猶命三良之殉乎若康公者不從其亂命可也孟子曰始作俑者其無後乎是俑亦不可用也況於人乎

又况國之良乎秦之族滅殆盡不獨始皇之酷暴君
子已徵其徵於用人殉葬之日矣

飢彼晨風鬱彼北林未見君子憂心欽欽如何如何忘
我實多

山有苞櫟隰有六駸未見君子憂心靡樂如何如何忘
我實多

山有苞棣隰有樹檎未見君子憂心如醉如何如何忘
我實多

晨風疾飛於北林喻舍去之速而無依戀之意也山
隰有上下喻夫婦之唱隨

欽欽者憂心之無他適也靡寧者憂心之無少愉也
如醉者憂心之莫能解也

此特據註為解耳若詩序刺康公也忘穆公之業始
棄其賢臣焉說自正大

豈曰無衣與子同袍王于興師脩我戈矛與子同仇
豈曰無衣與子同澤王于興師脩我矛戟與子偕作

豈曰無衣與子同裳王于興師脩我甲兵與子偕行

袍猶加於外也澤則親於肌膚矣裳又服之下體矣
一步親一步

訓註解澤字極妙

抑愚於此詩重有感焉周於西戎犬戎不共戴天之
讐也周天子苟能赫然為復讐之舉當時臣子豈無
同仇之義乎辭正而嚴師直而壯當必有不戰而屈
其兵者乃遷都不顧而委諸秦焉謂之何哉此詩之

作或者秦假此命以興師故其民曰王于興師脩我
戈矛與子同仇云爾不然岐豐之地雖屬秦而民心
猶知有王也此王于興師一王字似無着落

詩傳秦襄公以王命征戎周人赴之是

我送舅氏曰至渭陽何以贈之路車乘黃
我送舅氏悠悠我思何以贈之瓊瑰玉佩

詩序康公念母也

秦無禮義之國也乃康公為太子時知送舅氏知贈

遺之又思其母悠悠焉非良心之尚存乎詩錄之以存厚故不計其後令孤之後也

兩曰何以贈之云云若曰此皆薄物而不足以盡吾意也於我乎夏屋渠渠今也每食無餘于嗟乎不承權輿於我乎每食四簋今也每食不飽于嗟乎不承權輿

詩序刺康公也忘先君之舊臣與賢者有始而無終也凡人君之禮賢與賢者之所自處不獨在居食之間然非此不足以見其意也此而寢薄禮意從可知矣

此賢者之所為去也。註引楚元王穆生一段極佳。
權輿訓始字不知所自。以愚論之，權輿二物也。即鈞
衡並稱之謂。蓋權用以稱量事物，輿用以承載人民。
是有國之把柄也。人君於待賢一節，不知分曉，其何
以堪此大任？曰：不承權輿者，深嘆其不足以堪承也。
似非繼始之說也。敢問高明。

陳

子之湯兮，宛丘之上兮。洵有情兮，而無望兮。

坎其擊鼓宛丘之下無冬無夏值其鷺羽

坎其擊缶宛丘之道無冬無夏值其鷺翮

詩序刺幽公也淫荒昏亂將蕩無度焉

此子字指在上之人言無望者望之不似人君也上
之人為人所瞻仰者全在禮度之閑不循禮度而恣
情於遨遊歌舞之樂且無冬無夏而無少休息瞻望
之謂何此詩人所為刺也

東門之枌宛丘之栩子仲之子婆娑其下

穀旦于差南方之原不績其麻市也婆娑

穀旦于逝越以騶邁視爾如收貽我握椒

詩序疾亂也幽公淫荒風化之所行男女棄其舊業
巫會於道路歌舞於市井爾

葛覃云為締為綌七月云八月載績自君后下至於
生民未有不勤於紡績者不績其麻市也婆娑豈生
人之理

上有宛丘之君則下有東門之人所謂上有好者下

必有甚焉者也

想宛丘之勝在東門故此及其後二篇皆以東門起興

陳都宛丘其東門與丘之間乃國之交會處而有枌
桷二種之木可以休息故陳大夫子仲氏之女乃婆
娑遨遊於其下且直至南方之原野男女交會誘說
以相贈遺其淫蕩一至於此哉曰子仲之子則無責
乎下民矣

衡門之下可以棲遲泌之洋洋可以樂飢
豈其食魚必河之魴豈其取妻必齊之姜
豈其食魚必河之鯉豈其取妻必宋之子

凡人自足而無求則安往而不樂衡門一詩統是自
樂而無求之詞

大丈夫志天地四方不得行其志隱居而已矣讀此
詩令人有豁然出塵之思

東門之池可以沤麻彼美淑姬可與晤歌

東門之池可以漚紆彼美淑姬可與晤語

東門之池可以漚管彼美淑姬可與晤言

詩序刺時也疾僖公淫昏而思賢女以配君子也詩
緝因解池水漚麻紆與管朝夕浸漬然後柔韌而可
用僖公若得美好之賢妃相與居處夙夜警戒庶幾
改化也嗟乎君既淫昏忠臣良士之言尚無可入矣
雖得淑女為耦可望優柔漸入以望其改化哉其說
固已迂矣然則此詩宜何歸朱註男女會遇因所見

而起興是也觀晤歌晤語晤言自見得

因漚麻漚紆漚管而相歌語以致愛故其詞若此

東門之楊其葉牂牂昏以為期明星煌煌

東門之楊其葉肺肺昏以為期明星皙皙

東門之楊其葉牂牂然肺肺然昏姻之時已過矣故
緊接昏以為期句然無柰親迎而猶有不至者明星
煌煌明星皙皙其如此昏姻何哉序云刺時也昏姻
失時男女多違時使之然也

墓門有棘斧以斯之夫也不良國人知之知而不已誰
昔然矣

墓門有梅有鵲萃止夫也不良歌以訊之訊予不顧顛
倒思予

詩序刺陳陀也陳陀無良師傳以至於不義惡加於
萬民詩傳孔寧儀行父從君闕泄冶刺之

首章以棘況不良次章以鵲況不良

國人知之知而不已所謂人不堪其憂彼獨不改其

樂也

凡人之不良者初不畏人之知亦不顧人之訛至於顛倒然後致思則已無及矣此有識者必辨之於蚤不待狼狽而後爲無及之思也

防有鵲巢邛有旨苕誰侮予美心焉忉忉
中唐有甕邛有旨鷗誰侮予美心焉惕惕

詩序憂讒賊也宣公多信讒詩人爲賢者憂懼焉詩
傳靈公信讒囚泄治內子憂之

愚謂防不可為巢印必無盲莖也中唐安得有覺印
亦無盲鵲也此皆況人之俯予美者亦備一說說文
俯壅蔽也程子曰予美心所賢者詩緝解鵲巢積累
而成喻為讒之積漸莖草延蔓而生喻所讒之浸廣
誰壅蔽予所美之賢使我心忉忉然憂勞也中唐之
徑有覺非一覺也亦以積累而成功印有盲美之鵲
草雜衆色以成文猶讒言交織以成惑美亦體看得
好

月出皎兮佼人僚兮舒窈窕兮勞心悄兮
月出皓兮佼人懽兮舒懽受兮勞心慍兮
月出照兮佼人燎兮舒夭紹兮勞心慘兮

詩序刺好色也在位不好德而悅美色焉

親近曰僚流麗曰懽明皙曰燎

當月出之皎而唯佼人之思亦異乎綢繆束薪三星
在天之咏矣

舒字詩作舒遲解言佼人如月之初出而皎潔其行

止舒遲窈糾然姿態之美也是以實勞我心悄然而
憂思耳宋玉神女賦云其始進也皎若明月舒其光
正用此詩也

胡為乎株林從夏南匪適株林從夏南

駕我乘馬說于株野乘我乘駒朝食于株

胡為乎株林二句是問其行匪適株林二句是實其
事駕我乘馬二句是道其往之無他乘我乘駒二句
是道其見之欲亟

夏南夏姬之子也夏姬之事太褻詩人不欲斥言之
故託辭於其子

古今以色亡者多矣然未有如陳靈之為者其身弑
而國亡宜哉

朱氏曰衛之亂至墻有茨而極於是有狄入衛之禍
陳之亂至株林而極於是有楚入陳之禍比事以觀
可爲淫亂者戒

彼澤之陂有蒲與荷有美一人傷如之何寤寐無為涕

泗滂沱

彼澤之陂有蒲與藺有美一人碩大且卷寤寐無為中
心悄悄

彼澤之陂有蒲藺藺有美一人碩大且儼寤寐無為輟
轉伏枕

詩序刺時也言靈公君臣淫於其國男女相說憂思
感傷焉

蒲荷藺藺總是喻起美人之思

重看三無為字君臣上下所當為者豈其可已乃自
上及下維此美人之思他無所為豈成其為人哉豈
成其為國哉作詩刺淫者描寫至此真足以止人心
之淫令人惕然於其所當為者矣

陳風大抵與鄭衛相埒究其初則起於一大姬之好
樂耳閨門風化之原誠然哉

統陳詩觀之宛丘東門之粉刺蕩也而宛丘實為蕩
之端東門之楊防禦月出株林澤陂刺淫也而株林

實為淫之極而又蕪之墓門之不良則壞亂甚矣衡
門之樂為隱其亦有感於時之非乎

檜

羔裘逍遙孤裘以朝豈不爾思勞心忉忉
羔裘翱翔孤裘在堂豈不爾思我心憂傷
羔裘如膏日出有曜豈不爾思中心是悼

詩序大夫以道去其君也國小而迫君不用道好潔
其衣服逍遙遊燕而不能自強於政治大夫去之然

不忍遽忘其君也故曰豈不爾思云云

病痛在逍遙翱翔上故詩人就其服傷悼之不然則致美乎黻冕亦國君之所宜有者曷以刺焉

庶見素冠兮棘人樂樂兮勞心博博兮

庶見素衣兮我心傷悲兮聊與子同歸兮

庶見素韠兮我心蘊結兮聊與子如一兮

詩序刺不能三年也

有三年之喪則有既祥之素冠素韠素衣當時無有

為此喪者故賢者思一見之若是注慕之深

庶見者庶幾一見之也

服素冠者是為棘人而必有纍纍之狀故下二章不復言之

天理民彝在人心皆有一種惻然相觸處故見棘人之纍纍我心自博博其憂勞也見素衣而傷悲見素韞而蘊結亦此意

同歸二字謝疊山認是同歸於治之同歸甚善天理

在人心本無不同三年天下之通喪也人孰無三年之愛於其父母乎此禮久曠而庶見於一旦則心有不覺其傷悲者自將樂與之同歸於天理民彝之中也此是人性之同然處

同歸即與之為一如一即與之同歸非二意

聊與二字正與庶見二字應

此詩一意而三疊勞心博博就傷悲而與之同歸蘊結而與之如一矣若曰與子如一甚於同歸則彼之

素韞者更賢於素衣素冠者耶

隰有萋楚猗儺其枝天之沃沃樂子之無知

隰有萋楚猗儺其華天之沃沃樂子之無家

隰有萋楚猗儺其實天之沃沃樂子之無室

詩序疾恣也疾其恣於政刑不知恤其下也

人生幸其有知而樂其家室至於樂子之無知樂子之無家無室則其時誠孔亟而其情誠孔悲矣昔人云安得中山千日酒冥然直到太平時與此一律

匪風發兮匪車偈兮顧瞻周道中心怛兮
匪風飄兮匪車嘌兮顧瞻周道中心弔兮
誰能亨魚漑之釜鬻誰將西歸懷之好音

詩序思周道也國小政亂憂及禍難而思周道焉周
道訓適周之路非也風發是上天之變車偈是平地
之變此皆出於陡然不測者周先王之道綏柔惠懷
奠四國於泰山之安是真君子所履而小人所視以為
生者一旦崩弛蕩壞如風發車偈之不可測下民其

能無深思乎哉故曰顧瞻周道中心怛兮蓋深嘆其衰微而早冀其興復也此與大東章周道如砥周道二字同若四牡篇周道倭遲小弁篇蹻蹻周道則自作大路解無疑者

當時周衰極矣檜風猶稱顧瞻周道者何蓋周之道天下共由以為宗者使周之子孫猶能興起四國將則且效焉而奚至於陵遲之甚唯其綱弛紀壞甚於風掀而車覆而下國小民無復生理之存此覽世變

者深悼於心而致望西周之興復也

誰能烹魚二句不是興細味此二句亦不是誰能烹魚乎我則願為之溉其釜鬲也溉潤澤也善治國者如烹小鮮烹而不溉焦且壞矣溉之釜鬲以善其烹是周道也當時天子衰微諸侯強大徵求下國無復膏澤存焉蓋未有以烹鮮之道行之者故詩人憮然嘆曰誰能烹魚溉之釜鬲遂緊接誰將西歸懷之好音蓋深致望周道之復興非謂誰能烹魚乎我願為

之慨其金鰲以興起下句也

誰將西歸懷之好音亦不是我願慰之以好音將將
我之意也言將我之意於西方也西方之人或有奮
然興起之意是好音也我將日懷望之以冀其我答
耳此是下國惓惓注望之意如謂我願慰之以好音
不知將慰之誰人也愚謂詩意當不如是

簡兮曰云誰之思西方美人此曰誰將西歸懷之好
音當時致思於西周蓋如此可見文武周召之德入

人之深

呂東萊曰匪風下泉思周之詩獨作於曹檜何也曰
政出天子則強不凌弱各得其所政出諸侯則徵發
之煩供億之困征伐之暴唯小國偏受其害所以惓懷
宗周為獨切也此一段說得極透

曹

蜉蝣之羽衣裳楚楚心之憂矣於我歸處
蜉蝣之翼采采衣服心之憂矣於我歸息

蜉蝣掘閱麻衣如雪心之憂矣於我歸說

此必是上之人脩飾於容儀而忘遠慮者故作此以
為刺若曰與其目前之脩飾曷於我歸處焉而為深
長之思也云爾詩序刺奢也昭公國小而迫好奢而
任小人將無所依焉舉衣裳者特其一端耳

疏曰蜉蝣土裏化生掘地而出故曰掘閱其所取喻
或以生深宮之中習於華服而不知從儉也耶

彼侯人兮何戈與祲彼其之子三百赤芾

維鷦在梁不濡其翼彼其之子不稱其服

維鷽在梁不濡其味彼其之子不遂其媾

薈兮蔚兮南山朝隲婉兮孌兮季女斯饑

詩序刺近人也共公遠君子而好近小人焉

曹小國也赤芾何至三百之多耶此末章所謂薈兮

蔚兮南山朝隲者

彼其之子輕之之辭

彼其之子三百赤芾二句承在彼候人兮何戈與祿

之下要見候人者雖一職之微然皆各供其事任其勞也彼赤芾者優游於朝著之間不稱其服不遂其媾但比周為黨薈蔚如南山之朝藹何怪婉孌自守者之不得其食哉益深恨而痛刺之辭註候人而何戈與袂宜也此宜也二字未當

不濡其翼自愛其羽毛也不濡其味自擇其穀食也彼其之子服之不稱媾之不遂能無厚愧乎哉薈蔚今南山朝藹不獨狀氣馥之盛益狀此輩人皆速

化而登之臚仕所謂乘軒者三百人也正與前相應就三百赤芾說不稱其服就不稱其服說不遂其媾是行文之法

註婉孌自保不妄從人八字極妙即此便見彼三百赤芾薈蔚朝濟者皆不自保而妄以從人者也

鴈鳩在桑其子七兮淑人君子其儀一兮其儀一兮心如結兮

鴈鳩在桑其子在梅淑人君子其帶伊絲其帶伊絲其

弁伊騏

鴈鳩在桑其子在棘淑人君子其儀不忒其儀不忒正
是四國

鴈鳩在桑其子在榛淑人君子正是國人正是國人胡
不萬年

詩序刺不壹也在位無君子用心之不壹也大抵詩
皆反言以示刺

鴈鳩心一而無二其飼子也均君子之心固結而不

解故其為儀也一心如結兮是一章大綱領下文正是國人胡不萬年皆本於此

其子七兮正見其母之一而不二也

鴈鳩心一而不二故其子或在梅或在棘或在榛而皆仰視於其父母淑人君子其心一故其服有常其儀不忒而四國皆仰視以為刑

二章註中三則字甚無謂

正國人即承上正四國說非二層意

胡不萬年不是願其壽考詩意美此儀之可以正國
人者即萬年由之可也

首章由儀之一推本其心之一次章正指其儀之一
非心之一不能也三章表其可以正四國四章表其
可以至萬年總是美其心如結儀不忒克稱其為君
子也

列彼下泉浸彼苞稂
愾我寤嘆念彼周京
列彼下泉浸彼苞蕭
愾我寤嘆念彼周京

冽彼下泉浸彼苞蓂著愴我寤嘆念彼京師

芄芄黍苗陰雨膏之四國有王邠伯勞之

詩序思治也曹人疾共公侵刻下民不得其所憂而
思明王賢伯也

愴我寤嘆寤字最妙王室凌夷小國困敝君子何日
置於懷要唯寐則稍忘耳一寤則愴然發嘆矣辭曰
愴我寤嘆念彼周京益深致望西京之復振也

蕭蒿也用之以祭小明篇云采蕭穫菽

稂莠梁秀屬蕭則用以祭矣著則用以益矣下泉漸
浸及之則黍苗從可知已故末章云芄芄黍苗陰雨
膏之益思陰雨之膏以培植而傷寒泉之浸之為腐
壞也

末章註中二既字二又有字無謂詩意若曰黍苗之
芄芄然何以致之有陰雨以膏之也四國之民戴元
后為父母而有王何以得之有邠伯以勞之也自昔
聖王之惠澤下國益如此今無陰雨之膏而有下泉

之浸我寧無念彼周京乎哉

民心撫我則后虐我則讐其曰有王者全在王者存
心於天下而時使方伯以勞之耳如註所云似未妥
敢問高明

豳風

七月流火九月授衣一之日鬴發二之日栗烈無衣無
褐何以卒歲三之日于耜四之日舉趾同我婦子饁彼
南畝田畯至喜

七月流火九月授衣春日載陽有鳴倉庚女執懿筐遵
彼微行爰求柔桑春日遲遲采繁祁祁女心傷悲殆及
公子同歸

七月流火八月萑葦蠶月條桑取彼斧斨以伐遠揚猗彼
女桑七月鳴鵲八月載績載玄載黃我朱孔陽為公子裳
四月秀萋五月鳴蜩八月其穫十月隕箚一之日于貉
取彼狐狸為公子裘二之日其同載績武功言私其縱
獻豸于公

五月斯螽動股六月莎雞振羽七月在野八月在宇九月在戶十月蟋蟀入我牀下穹窒熏鼠塞向墜戶嗟我婦子曰為改歲入此室處

六月食鬱及薺七月亨葵及藟八月剥棗十月穫稻為此春酒以介眉壽七月食瓜八月斷壺九月叔苴采荼薪樗食我農夫

九月築場圃十月納禾稼黍稷重穋禾麻菽麥嗟我農夫我稼既同上入執宮功晝爾于茅宵爾索綯亟其乘

屋其始播百穀

二之日鑿冰冲冲三之日納于凌陰四之日其蚤獻羔
祭韭九月肅霜十月祿場朋酒斯饗曰殺羔羊躋彼公
堂稱彼兕觥萬壽無疆

詩序陳王業也周公遭變故陳后稷先公風化之所
由致王業之艱難也

傳曰民生在勤勤則不匱自君后以至於民未有不
由勤得之者豳風一詩全是說小民終歲勤動為衣

食計而又思所以尊其君親其上為君者宜惻然動心思所以勸率而勞苦之使下無失所之民也周家八百年基業培植全在於此

七月之詩一言蔽之曰豫而已凡感節物之變而脩人事之備皆豫為之謀也觀七月流火之候即興授衣之念則通篇之意可識矣

衣食王道之始農桑衣食之原上有無逸之君日夕計民之衣食民自然思勤其農桑養老而慈幼而尊

君親上克盡祭祀燕饗祝禱之誠矣詩詞統是說民
詩意統是風上

民無衣則寒一日不再食則饑饑寒切身雖慈母不
能保其子故七月篇首陳無衣無褐何以卒歲同我
婦子饁彼南畝以感動其君

曰衣無褐者幽地寒非褐不足以禦之也

纔脩田器即舉足而耕少壯者在田老幼者致餉真
無一時敢自逸者不待勸而勤此田畯之所以至喜

也

春日載陽至爰求柔桑是女子親蠶事若春日遲遲
采繁祁祁四句是因采桑又見此采繁以共祭者遂
思及公子同歸而豫為之傷悲也註蠶生未齊未可
食桑采繁以啖之考爾雅繁前諸草生傳云可以生
蠶陸氏云用以洗蠶種然予湖人也家無不蠶而未
聞有以繁啖蠶洗蠶種者不敢信以為然也

公子公家之女子也民間之女子思及與公家之女

子同歸故豫以遠父母為憂而蠶事之汲汲耳祭祀亦農桑所共給者故就求桑桑及采桑一節八月荏葦一語不重詩人意謂七月流火八月即收荏葦亦為蠶事計當此蠶月可不勤其事乎語意與前九月授衣同

女桑與桑桑異桑桑是蠶初出所食者小桑則條桑之小者耳蠶盛時所食者衆故小大之桑悉取也桑性以斬伐而始茂故條取之女桑未可斬伐故存其

條皆豫為明年蠶計也

七月鳴鵲四句全重在載績上績則可以就染矣故
緊承載玄載黃我朱孔陽

條桑是蠶而為帛載績是績而為衣

古人從厚動輒先公而後私故纔一載績便思為公
子裳一取狐狸便思為公子裘一績武功便思獻駢
于公

曰一之日于貉取彼狐狸必從四月秀萸說起既欲

生民之察其時又見蠶事之後又有獲之一事始及于褐也重八月其獲一句

一之日于貉專取狐狸為裘以共上二之日其同則同事于狩併縱斫盡取之矣蓋上之褐首狐而次斫下之褐即縱亦可用也

貉賤者之服也纔于貉即思取狐狸為公子裘即前為公子裳之意

褐毛布也皮亦毛類故及之

春蒐夏苗秋獮冬狩獵皆有常度也而武事寓於其
內故云載績武功

五月斯螽動股一章全是審候蟲之屢更見寒意之
漸至必穹室熏鼠塞向墜戶入此室處乃可以卒歲
也

穹室熏鼠是二事穹穹隆而高者兩垂之側有空則
室之使無寒氣之入熏鼠則熏墻壁間之穴也熏竟
則併塞之矣

嗟我婦子曰為改歲是老者之辭條桑載績言私其
縱老者亦足於衣褐矣而少壯者未必有也天時祁
寒稼事已畢入此室處亦人情之所宜有者故老者
特愛憐而命入之

民情莫不欲壽其親故從六月食鬱及薺說到為此
春酒以介眉壽民情莫不欲自食其力故又從七月
食瓜說到采荼薪樗食我農夫

薪樗者積樗為薪也此虛字與上采字對

介眉壽或泥註兼供老疾奉賓祭曰賓祭之祝皆有
所謂稱壽者亦通

九月築場圃四句總是起嗟我農夫三句見今歲之
農事甫畢可為宮功之執而又思來歲之農事在即
不敢為急緩之計此統是幽民之勤農意

上入執宮功還是官府之役若說入邑葺治其它秋
冬居之則上文穹室熏鼠塞向墜戶入此室處又誰
居之耶二畝半為廬在田二畝半為宅在邑或恐是

周制非幽俗也要識得

上入執宮功見古者之後只爲宮室城守計此外無
盥役也

藏冰獻祭是民之共宴饗稱觴是民之厚然詩意全
不在此若曰二之日不獨績武功三之日四之日不
獨于耜舉趾又有藏冰獻祭一事亦係於職分而不
可已者九月十月不獨築場圃納禾稼又有宴饗稱
觴一節亦根於至情而不容已者總見農夫無一刻

之暇為人上者不可頃刻忘稼穡之務也

補傳云國人以羔羊朋酒自詣公堂其禮甚野其意甚真雖在立國之初庶事草草然非三代之時安得此風俗也

獻羔祭韭不獨是供上之祀四月盛陽不發冰之藏則陽失之亢而歲亦不登獻羔以啟其藏所以變陰陽而成歲事也

七月之詩凡八章起或稱七月流火或稱四月秀萼

或稱五月斯螽動股或稱六月食鬱及薺或稱九月
築場圃或稱二之日鑿氷冲冲似參差不齊然首章
是衣食之總次章三章則由蠶而及於績四章五章
則由褐以及於處見衣褐以卒歲者若是其終歲以
勤動也六章叙田功以足食七章就宮功以思農八
章共祭祀致祝饗見所謂于耜舉趾者統為此事計
不得不終歲以勤動也語意極聯絡血脉極貫通讀
者不可草草

方蠶而思及公子同歸方蠶績而思為公子裳方貉
而思為公子裘又獻斚于公而復為室處計則彼錦
衣天下者當思衣所自來而重自惜矣方介壽食農
而又為宮功之執又鑿冰以獻羔祭韭又舉酒而升
堂致祝則彼玉食天下者當思食所自來而重自惜
矣古詩云鋤禾日當午汗滴禾下土誰知盤中飧粒
粒皆辛苦又云昨日出城郭歸來淚滿襟遍身綺羅
者不是養蠶人又曰二月賣新絲五月糶新穀醫得

眼前瘡剗却心頭肉但願君王心化作光明燭此三
詩足發幽風之義君心玉燭敢有望於今日云

此當合尚書無逸一篇看

鴟鵂鴟鵂既取我子無毀我室恩斯勤斯鬻子之閔斯
迨天之未陰雨徹彼桑土綢繆牖戶今女下民或敢侮
予

予手拮据予所持荼予所蓄租予口卒瘠曰予未有室
家

予羽譙譙予尾脩脩予室翹翹風雨所漂搖予維音曉
曉

居東東征是二事居東者周公始聞流言而避居於
東也東征者成王既迎周公以歸而往征其罪也觀
書金縢云居東二年則罪人斯得東山云自我不見
於今三年則知周公居東僅二年東征則三年非一
時事矣讀者徒泥罪人斯得一語謂是東征以誅管
蔡不知此不如是解蓋初流言時舉國莫知罪之所

自出自周公避居東都二年成王始得罪人之主名
迎周公以歸破斧缺斨以征之則歷三年耳此註云
周公東征二年乃得管叔武庚而誅之似欠考証愚
不敢以不辯

三監之叛原始於武庚非由於管叔武王伐紂而封
紂之子武庚以存其祀天下之至仁也使三叔監之
天下之至公也為武庚者德周可矣協三監以效忠
可矣乃武庚不念周之封為大德而唯毒周之亡其

國日夜思所以為叛偶見管叔兄也而居外周公弟也而居內乘此間計取管叔而誘之流言蓋實欲毀周之室家也故此詩首云鴟鴞鴟鴞既取我子無毀我室註二叔以武庚叛非當改作武庚以二叔叛恩勤二字宜串看蓋父母恩愛其子無所不用其情則其為之勤勞也亦無所不極其至是皆見之於鞠育之間而實可憐閔者彼無端而計取之不亦太毒乎

此詩大旨存王室故首章出無毀我室一句次章即承云迨天之未陰雨徹彼桑土綢繆牖戶云云見為室家者必如是其豫備而後可免或然之虞也三章予手拮据予所將荼云云正言其所徹取而綢繆者無非為此室家計四章予羽譙譙予尾脩脩云云正言其為室家計者若是其勞苦而盡瘁乃今忽有意外之變傾危在旦夕之間予斯不能已於嘵嘵之鳴耳觀無毀我室綢繆牖戶曰予未有室家及予室

室翹翹數語則此詩之大旨見矣

綢繆牖戶是總說拮据卒瘁正其所爲綢繆事

凡鳥營巢必手口共作故始稱予手拮据後稱予口卒瘁將荼蓄租正其所拮据而卒瘁者

周公在當時事爲之制曲爲之備無非爲王室謀以立萬年不拔之業乃當時或疑其所爲謀者皆爲已計今攝政而將不利于孺子故作此詩以曉成王此不獨有國者宜朝夕諷咏以爲警即士庶之始爲

為家室者鞠育之恩勤綢繆拮据之艱苦未有不至
於羽譙譙而尾脩脩者乃子孫無端自召其風雨啓
民之侮而毀我之室獨不念締造之艱難乎宜各寫
一通置之座右

我徂東山惓惓不歸我來自東零雨其濛我東曰歸我
心西悲制彼裳衣勿士行枚蝟蝟者蠋烝在桑野敦彼
獨宿亦在車下

我徂東山惓惓不歸我來自東零雨其濛果羸之實亦

施于宇伊威在室蠨蛸在戶町疇鹿場熠燿宵行不可
畏也伊可懷也

我祖東山滔滔不歸我來自東零雨其濛鶴鳴于垤婦
嘆于室洒掃穹室我征聿至有敦瓜苦烝在栗薪自我
不見于今三年

我祖東山滔滔不歸我來自東零雨其濛倉庚于飛熠
燿其羽之子于歸皇駁其馬親結其縈九十其儀其新
孔嘉其舊如之何

四章統是體征人之意慶幸其歸可以慰室家之願也觀起語並以我祖東山為賦則其情可知已惱惱不歸言初從征時惱惱無歸志也

既東歸矣曷為其西悲也曰此人情也置室家遠行非人情之所欲一旦釋甲冑而完歸其喜悅當何如哉喜之之極不覺反生其悽愴也今人遇喜事而生悲正如此

勿士行枚士字即作軍士之士看亦可

行枚二字宜聯看

初往東時常虞懼於鋒鏑而今敦然獨宿於車下視
死於瘡痍亦天壤矣此士之所以懽幸也敦團聚之
之貌獨者對衆之辭

家無主者即內有室人其荒涼光景必至於此果羸
之實數句描寫淒然如畫

想室中景象似可畏矣然儘在外之受用不若居室
之荒涼况出一生於萬死而今得旋歸其懷思曷容

已哉曰不可畏也伊可懷也可謂曲盡人情矣

婦嘆于室亦聞東征而愴嘆也與我心西悲正相照
應

洒掃是潔其中穹窒是固其外總之待夫之至而安
藉之也我征聿至其喜當何如哉註行久而感深語
妙甚

男女居室自是人間一樂事東征聿歸而各得完聚
益皆出於望外者其新舊之喜悅豈可勝言哉讀可

憐無定河遶骨猶是春閨夢裡人之句則知此詩之體念人情非聖人不能作也

既破我斧又缺我斨周公東征四國是皇哀我人斯亦孔之將

既破我斧又缺我錡周公東征四國是晬哀我人斯亦孔之嘉

既破我斧又缺我鉞周公東征四國是邁哀我人斯亦孔之休

又按公提王師臨小醜若用兵力一鼓滅之何待三年之久乎觀書載公化商之事勤奉懇惻如父兄之愛其子弟則可識詩人之所謂哀人斯矣哀我人斯而肯用兵器以殺戮乎

詩緝辯斧斨及錡鉞非征伐之兵器也蓋周公奉王命以討罪有征無戰四國聞王師之至即窮蹙自守周公又遲之三年不為急攻之計故未嘗從事於戰陣維行師有除道樵蘇之事斧斨錡鉞之用為多歷

時之久則必敝故詩首及此耳若云兵器則是與血戰而取勝也曷云周公東征四國是皇哀我人斯亦孔之將云云哉此血流漂杵孟子所不盡信於書者也此辯甚有理可從

按七月篇云取彼斧斨以伐遠揚墓門篇云墓門有棘斧以斯之通作伐木之器說非兵器也傳曰錡鑿屬鉞木屬皆非兵器若兵器則宜用弓矢干戈矛戟矣何取于斧斨錡鉞哉

哀我人斯亦孔之將繫承四國是皇說蓋四國之人
惑於流言之騰其心必搖動而不能自主也如是則
何利之有自天誅一加而使知從逆者之無所逃干
紀者之不能遁則民志帖然其大定矣是造福之極
大者是之謂哀我人斯亦孔之將

叱訓化適訓歛而固極當當時羣叔流言四國必有
去正而從邪者必有縱肆而不軌者天討加而化誨
之使歸於正戢歛之使守其法誰復有陷于匪彛者

乎故繫承之曰哀我人斯亦孔之嘉亦孔之休

讀東山之詩見周公體歸士之心讀破斧之詩見歸士識周公之心

伐柯如何匪斧不克取妻如何匪媒不得

伐柯伐柯其則不遠我遘之子遘豆有踐

註亦是以愚論之詩人意若曰嘗言伐柯矣今視此柯也其則端具於其身信乎柯必伐而後可識其則也嘗言娶妻矣今遘之子也遘豆燦然其有踐信乎

妻必娶而後可識其禮也此兩喻蓋謂平日欲見公
今一見之得瞻儀範之隆挹禮度之美不虛此願見
之心故言之疊疊有深幸耳書曰凡人未見聖若弗
克見聖既見聖若弗克由聖即此之謂也若止言得
見之易意義淺淡無味敢問高明

九罭之魚鱗魴我覲之子衮衣繡裳

鴻飛遵渚公歸無所於女信處

鴻飛遵陸公歸不復於女信宿

是以有袞衣兮無以我公歸兮無使我心悲兮

唯九斿而後得鱗魴是甚不易見也今我覲之子而得覲袞衣繡裳之儀範焉此生亦何幸哉

鴻非就於渚者亦非就於陸者偶飛而遵渚遵陸耳公歸豈無所乎歸豈復來乎蓋不過信宿於是焉而已此東人繾綣不忍公去之至意也

是以有袞衣兮其欣仰亦何至無以我公歸兮無使我心悲兮其懷戀亦何深信非盛德不足以至此

狼跋其胡載鼈其尾公孫碩膚赤舄几几

狼鼈其尾載跋其胡公孫碩膚德音不瑕

凡人小過顛蹶跋于前則鼈于後鼈於後則跋於前
此何以故充養未至而變故之得以櫻吾衷也聖人
之衷常一而常定常定而常閑風霾陰暄而太空自
如濤浪掀翻而坎止自若舜不迷於烈風雷雨禹不
懼於黃龍負舟孔子不畏於匡周公自得於東皆其
天之常定也究其本則范氏無欲二字盡之矣此段

註極透快可誦

書金縢云武王既喪管叔及其弟流言於國曰公將不利於孺子周公乃告二公曰我之弗辟我無以告我先王是周公避居東都實案也夫以周公恩勤鞠育之深綢繆拮据之甚功在王室碩大而膚敏夫孰不見且亮之而一旦避出居東非公之自孫而何哉詩曰公孫碩膚蓋亦道其實也

嚴華谷曰凡人處利害之變則舉止不安其常懼者

或至于喪屢喜者或至于折屐詩人以赤烏几几為周公之聖其善形容聖人矣


赤烏几几無失其常度德音不瑕無玷其聲聞此之謂周公

古今稱輔幼主者曰伊尹周公矣太甲狎于不順也伊尹嘗放之於桐成王惑于流言也周公顧避之于東何其畏嫌也曰周公之所處與伊尹異太甲之不順太甲一時之非而其心則知有尹也君知有尹而

當時又無如尹者非尹以先王訓戒之安望其改圖
若周之流言出於管蔡之親而驟入於成王之耳其
惑有未易解者一旦弗避而相疑若王室何而況乎
當時猶有二公在也卒之風雷變而金縢啓而迎好
如初公之一避其可少哉故知其君之心而又無
可退托者不嫌於直任有見疑於君而其間又有可
托者不嫌於少遜

太王避狄人曰肆不殄厥愠亦不殞厥問周公避居

東曰赤鳥凡几德音不瑕



重訂詩經疑問卷三